



## ЎЗБЕКИСТОН РЕСПУБЛИКАСИ МАРКАЗИЙ БАНКИ БОШҚАРУВИННИГ ҚАРОРИ

**Аҳоли бандлигини таъминлаш учун тижорат банклари томонидан микрокредитлар ажратиш тартиби тўғрисидаги низомни тасдиқлаш ҳақида**

Ўзбекистон Республикасининг “Ўзбекистон Республикасининг Марказий банки тўғрисида”ги ва “Банклар ва банк фаолияти тўғрисида”ги қонунларига мувофиқ Ўзбекистон Республикаси Марказий банки Бошқаруви қарор қиласди:

1. Аҳоли бандлигини таъминлаш учун тижорат банклари томонидан микрокредитлар ажратиш тартиби тўғрисидаги низом иловага мувофиқ тасдиқлансин.
2. Мазкур қарор расмий эълон қилинган кундан эътиборан кучга киради.

Ўзбекистон Республикаси  
Марказий банки Раиси



Нурмуратов

Тошкент ш.,  
2018 йил 21 февраль  
6 / 1-сон

Ўзбекистон Республикаси  
Марказий банки Бошқарувининг  
2018 йил 21 февралдаги  
6/1-сон қарорига  
ИЛОВА

**Аҳоли бандлигини таъминлаш учун тижорат банклари  
томонидан микрокредитлар ажратиш тартиби тўғрисидаги  
НИЗОМ**

Мазкур Низом Ўзбекистон Республикасининг “Ўзбекистон Республикасининг Марказий банки тўғрисида”ги, “Банклар ва банк фаолияти тўғрисида”ги, “Микромолиялаш тўғрисида”ги, “Тадбиркорлик фаолияти эркинлигининг кафолатлари тўғрисида”ги қонунлари ҳамда Ўзбекистон Республикаси Президентининг 2017 йил 8 августдаги ПҚ-3182-сон “Худудларнинг жадал ижтимоий-иқтисодий ривожланишини таъминлашга доир устувор чора-тадбирлар тўғрисида”ги қарорига асосан аҳоли бандлигини таъминлаш учун тижорат банклари томонидан микрокредитлар ажратиш тартибини белгилайди.

**1-боб. Умумий қоидалар**

1. Мазкур Низомда куйидаги асосий тушунчалардан фойдаланилади:

**тавсиянома** – Ўзбекистон Республикаси Президентининг 2017 йил 8 августдаги ПҚ-3182-сон “Худудларнинг жадал ижтимоий-иқтисодий ривожланишини таъминлашга доир устувор чора-тадбирлар тўғрисида”ги қарорига асосан туман (шаҳар)ларда ташкил этилган секторларнинг тегишли раҳбари, туман (шаҳар) ҳокимининг ўринбосари – хотин-қизлар қўмитаси ва фуқароларнинг ўзини ўзи бошқариш органлари раисининг аҳолини муайян меҳнат турлари билан шуғулланиш учун имтиёзли кредитлаш бўйича тавсияномаси;

**қарз олувчи** – тавсиянома берилган муайян меҳнат турлари билан шуғулланиш истагида бўлган фуқаро;

**банк** – Ўзбекистон Республикаси Марказий банки томонидан белгилаб берилган, қарз олувчиларга микрокредитлар ажратадиган тижорат банки.

**2-боб. Микрокредитларни ажратиш шартлари**

2. Микрокредитлар қайтаришлик, тўловлилилк, таъминланганлик, муддатлилилк ва мақсадли фойдаланиш шартлари асосида берилади.

3. Микрокредитлар биринчи навбатда, худудларда аҳоли учун муносиб турмуш шароитларини яратиш, муайян меҳнат турлари билан шуғулланиш истагида бўлган аҳолини тадбиркорлик фаолияти орқали бандлик билан таъминлаш учун имтиёзли шартлар асосида берилади.

4. Микрокредитлар:

илгари олинган кредитларни ёки ҳар қандай бошқа қарзларни қайтариш;

алкоголь ва тамаки маҳсулотлари ишлаб чиқариш;

савдо-воситачи ва умумий овқатланиш ташкилотлари айланма маблағларини шакллантириш;

савдо ва умумий овқатланиш объектларини куришни молиялаш, қимор ва таваккалчиликка асосланган бошқа ўйинларни ташкил этиш ҳамда улар учун ускуналар сотиб олиш;

ишлаб чиқариш мақсадлари учун ишлатилмайдиган шахсий мулкни сотиб олиш;

маъмурий харажатларни тўлаш, жумладан хизмат автомобиллари таъминоти;

мебель, уяли телефон сотиб олиш, шунингдек алоқа хизматларига тўлов мақсадлари учун берилиши мумкин эмас.

5. Микрокредитлар банклар томонидан қарз олувчиларга энг кам иш ҳақининг 100 баравари микдоригача йиллик 7 фоиз ставкада ажратилади.

Банклар ўз ички кредит сиёсатига асосан республикамизнинг алоҳида худудларида истиқомат қилувчи қарз олувчиларга мазкур Низомда белгиланган фоиз ставкасидан камайтирилган фоиз ставкаларда микрокредитлар ажратиши мумкин.

6. Қарз олувчиларга микрокредит қайтариш муддатини узайтириш хукуқисиз, камида 3 ойдан 6 ойгача бўлган имтиёзли давр билан, 3 йилдан кўп бўлмаган муддатга банк кредит кўмитасининг белгиланган тартибда расмийлаштирилган қарори асосида берилади.

### **3-боб. Микрокредитларни расмийлаштириш**

7. Микрокредит олиш учун қарз олувчи томонидан банкка қуидаги хужжатлар тақдим этилади:

тегишли мақсад бўйича микрокредит олиш учун сўралган ариза;

тавсиянома;

шахсий томорқа участкаларида маҳсулот этиштиришни кенгайтириш мақсадлари учун микрокредит сўралган ҳолларда қарз олувчидан томорқа участкаси мавжудлиги кўрсатилган ўзини ўзи бошқариш органлари томонидан берилган маълумотнома;

микрокредитни қайтаришнинг таъминланиши тўғрисида хужжат.

8. Микрокредитлар қайтарилишининг таъминоти сифатида банкка қуидаги таъминот турларидан бири тақдим этилади:

мол-мулк гарови;

учинчи шахс кафиллиги;

қарз олувчи томонидан олинган микрокредитни қайтармаслик хатарининг банк фойдасига сугурта қилинганлиги тўғрисида сугурта полиси.

Микрокредитлар қайтарилиши бўйича учинчи шахс кафиллиги тақдим этилганда, кафилнинг охирги 12 ой учун доимий иш жойидан (доимий иш жойи мавжуд бўлганда) берилган маълумотномалар ёки унинг охирги 12 ой учун даромадлари тўғрисидаги декларацияларнинг яшаш жойидаги давлат солик органи томонидан тасдиқланган

нусхалари тақдим этилади.

Банкларнинг ички кредит сиёсатига мувофиқ қарз олувчиларга мазкур бандда назарда тутилган таъминот турларидан бирини талаб қиласдан бланкли (ишончли) кредит бериш хукуқига эга. Бунда банк қарз олувчи томонидан олинган микрокредитни қайтармаслик хатарини суғурта қилиши шарт.

9. Қарз олувчи мазкур Низомнинг 8-бандида назарда тутилган тегишли хужжатларни топширишда ўзининг шахсини тасдиқловчи хужжатини кўрсатади ҳамда ундан нусха тақдим этади.

10. Микрокредит сўраб, барча зарур хужжатлар илова қилинган ҳолда берилган ариза банкка келиб тушган кундан бошлаб, банк кредит қўмитаси томонидан ушбу ариза бўйича қарор қабул қилиш муддати 3 иш кунидан ошмаслиги лозим.

11. Микрокредит бериш асослантирилган ҳолда рад этилган тақдирда, банк аризачига бу ҳакда кейинги иш кунидан кечиктирмаган ҳолда ёзма шаклда маълум қилиши шарт.

#### **4-боб. Микрокредитларни ажратиш ва уларни қайтариш**

12. Микрокредитлар қарз олувчининг ссуда ҳисобварагидан унинг тўлов топширикномасига асосан, кредит шартномасида белгиланган мақсадлар учун тегишли ташкилотларнинг банкдаги талаб қилиб олингунча депозит ҳисобварагига пул ўтказиш йўли билан амалга оширилади.

13. Микрокредитлашнинг мақсадидан келиб чикқан ҳолда микрокредит суммасининг 30 фоизи миқдоридаги қисми нақд пул кўринишида берилиши мумкин.

14. Қарз олувчиларга берилган микрокредитлар ҳисоби алоҳида белгиланган баланс ҳисобваракларида юритилади.

15. Қарз олувчи микрокредит ҳамда унга ҳисобланган фоизларни нақд пулда, банк пластик карточкалари орқали ёки қарз олувчининг омонат ҳисобварагидан пул ўтказиб бериш йўли билан тўлаши мумкин.

16. Банк томонидан микрокредитдан фойдаланишининг муддати давомида микрокредитдан мақсадли фойдаланилаётганлигини аниқлаш бўйича бевосита жойига чиқиб, доимий мониторинг ўтказилади.

17. Олинган микрокредитдан бошқа мақсадда фойдаланилганлик аниқланган тақдирда, банк кредит шартномасида белгиланган тартибда микрокредитнинг мақсадсиз ишлатилган қисмини қарз олувчидан муддатидан илгари ундириб олиш хукуқига эга.

18. Қарз олувчи томонидан микрокредит бўйича асосий қарзи ва унга ҳисобланган фоизлар тўланмаган тақдирда, банк тавсиянома берган сектор масъулларига амалий ёрдам сўраб мурожаат қилиши мумкин.

19. Ўзининг кредит портфелида тавсияномалар асосида ажратилган микрокредитлар бўйича муддати ўтган қарздорлик миқдори 10 фоиздан ошганда, банк филиали тавсияномалар асосида микрокредитлар ажратилишини тўхтатиши ҳамда тавсиянома берган сектор масъуллари кирқимидағи маълумотларни Марказий банкнинг ҳудудий Бош бошқармасига тақдим этиши шарт.

20. Банк филиаллари тавсияномалар асосида ажратилган микрокредитлар бўйича скоринг тахлил ўтказиб, ойлик ҳисоботларни Марказий банкнинг худудий Бош бошқармаларига, Марказий банкнинг худудий Бош бошқармалари эса ушбу ҳисоботларни Қорақалпогистон Республикаси Вазирлар Кенгаши, вилоятлар ва Тошкент шаҳар ҳокимликларига тақдим этади.

21. Микрокредитлар бўйича қарздорликни ундиришда биринчи навбатда микрокредитдан фойдаланганлик учун фоизлар ундирилади.

22. Микрокредит белгиланган муддатларда қайтарилимаган тақдирда, банк ундирувни қонун хужжатларида белгиланган тартибда микрокредитнинг қайтарилиш таъминоти сифатида тақдим этилган таъминот турига каратади.

#### **5-боб. Яқунловчи қоида**

23. Ушбу Низом талабларини бузишда айбдор шахслар қонун хужжатларида белгиланган тартибда жавобгар бўлади.

